

Na Wipere "Whakamahia te whenua ki te kaanga."

Na Timi Kara i runga i te takatu o te pakeha kia tukua nga whenua maori ki a hokona kia whakaritea te maori ki te pakeha "Taihoa."

Na A. T. Ngata "Kia kaha ki te mahi, ki te whakakaporeihana, ki te whakatopu paanga whenua."

Koia tenei ko nga reo kaha e paaha ana i roto i nga rohe e wha o te motu a kei Te Tairawhiti rawa e tino kaha ana tenei reo i roto i enei ra.

Ka rua tekau ma wha enei tau e penei ana te reo ki te Tairawhiti, i roto i tenei ra kua tu mai a Ngata hai Minita Mo Nga Mea Maori, a kua kaumatuatia kaore ki waenganui i a tatou anake engari ki te motu katoa me ana kupu tohutohu i a ia e penei ana me tatou nei, kaati i a ia kua tu nei hei Minita mo Te Kawanahanga a he Kawanatanga kei te tu oioi noaiho, na reira e tika ana kia pau nga kaha o te iwi nui tonu ki te tono tono i nga mea katoa, moni mai, whakatau mai, mahara mai mo te taha o te ora tinana, me nga mahi whakanohonoho whenua, whakawhiwhi ranei ki te whenua.

Kaua hei hoki i te waewae tutuki, apa ano hei te upoko pakaru." Ana etahi o tatou mema me o tatou hoa kei te whare e whanga mai ana kia hoatu he mahi ma ratou. Kei te kaha a Maui, a Tau Henare, a Te Tuiti Makitanara, me Te Raumoana ratou ko ana tamariki o tetahi wahanga o Te Ropu o Whanganui-a-Tara kei te rika katoa mai ki te awhina i te iwi.

Mo te patai a nga mea e tauhou ana "Ko wai tenei ropu a Te Whanganui-a-Tara?" Kia mohio mai koutou ko te ropu taitamariki kei Poneke e noho ana ko Witako to ratou Kaumatua ma ratou koutou e whakatangata whenua ki nga mea katoa e hiahia ana e koutou, ahakoa no tewhea hau koutou e haere pohe atu ana ki Poneke mo a koutou nei mahara maha, ma taua ropu koutou whaka tangata whenua ki a koutou taonga e hiahia ana.

Kei Akarana ko tera ropu ara "Ko Akarana Association" hei mokai hei rangatira ranei mo koutou.

Kei Te Waipunamu ko Te Ropu o Murihiku. Kei Wanganui ko Te Aute Kareti Old Boys' Association. Kei Turanga ko Te Y.M.P. Kei Te Wairoa ko Te Kahunganu Welfare League. Kei Heretaunga ko Te Heretaunga Ropu.

Kua tu mai hoki to Matatua Ropu.

I whakatuturia enei ropu i runga i te mahara kia puta he koha ma te hunga taitamariki ki te iwi.

Kei te kitea whanuitia ake te haeretanga whakamua o nga mea katoa, ahakoa kei te takitahi te tu mai i tena wahi. E tika ana kia mana nga tumanako, ara kia nui nga toa i tena huarahi i tena huarahi, i tena mahi i tena kaainga i tena